



FRIDAY 11:00 P.M.:

**Tippaman playing
for the last time
on Aruba**

WHISKY
ROADHOUSE CAFE
ARUBA

P.S. Saturday \$2 Bar from 9:30 P.M. - 10:30 P.M.

DANDE NA HULANDA CELEBRANDO SEGUNDO LUSTRO

ORANJESTAD (AAN): E organizadornan Ovi Henriquez y Elvia Maduro ta gradici tur hende cu a coopera cu nan durante di e di segundo lustro di Festival di Dande na Hulanda, y tambe na esnan na Aruba cu no por ta presente na e di 10 Festival di Dande.

Ora cu nan habri e archivo di e prome Festival di Dande nan ta corda hopi loke a pasa cu e Prome Festival, y cu a pone e fundeshi cu a bira realidad awe. E foto aki mes ta bini for di e Prome Concurso di Dande na 1985.

Prome cu e Festival aki a worde organiza, tabata na un fiesta pafor na Eindhoven unda nan tabata warda 12'or bati pa duna tur presente, para pafor wardando sala habri, un Bon Aña. Den sala durante e fiesta nan grupo di banda di e tempo ey, "Sensacion Latina" a trece un Dande y e publico a keda masha impresionado cu despues di hopi aña a tende e Dande pa nan celebra.

Aki ta papia di aña 1984, y despues di un aña nan a toca e Dande na e Club di Paradijsel na Capel a/d Yssel y e publico Arubiano a pidi nan pa otro aña si por organiza un Concurso di Dande pa nan na Hulanda, mescos cu ta worde organiza na Aruba pa Harry Croes. Asina pues Ovi Henriquez a priminti cu e lo bay organize pa complace e publico Arubiano na Hulanda. Esaki a sosode te cu awor nan ta bay celebra 10 aña consecutivo.

DIARIO a compronde cu esey tabata un trabao hopi dificil pa cuminsa den e trayectonnan cu tin cu cana den tur e frieu cu tin na Hulanda, enbusca di instan-

cianan (p.e. sala, polis, brandweer, gruponan, cantantenan, patrosinadornan) pa organiza e "Prome Concurso di Dande". Den tur esfuerzo tog e Arubianonan a responde masalmente den e prome concurso di Dande cu a bira e "Festival di Dande", te cu e sala a yena asina tanto cu mester a pidi ayudo di Polis y Brandweer pa no permiti mas persona den sala. Hopi no por a drenta e dia ey. Tabatin por lo menos 500 persona den e sala y no por a laga mas hende drenta.

Por papia di hendenan cu a keda para den e foyer pa scucha e Dande via un speaker.

Nan tabatin 3 grupo cu ta "Vicente y su Ambiente", "Grupo Folclorico" y "Tipico Arubiano" cu nan participantenan cu ta Rosita Rasmijn, Ipi Yarzagaray, Astrid Tromp, Petolichi Jacobs, Jo Oduber, Anthony Kelly, Vicente Arends, Kenneth Giel, Glenda Croes, y Segundo Tromp.

Como miembro di hurado tabatin Mario Croes di Amsterdam, Nico Nicolaas di Utrecht, Coby Angela di Den Haag, Oscar Steba di Rotterdam, Casin Giel di Helmond, y Faritha Luidens di Helmond a fungi como presidente di hurado.

Como maestronan di ceremonia tabatin Doochi Croes y Lidia Donker. Ganador di e prome concurso di Dande tabata Anthony Kelly. Publico a comporta nan mes tremendo, manera tur e añanan siguiente.

E prome concurso di Dande a worde organiza den sala di Gemeente Rotterdam, cu ta un aula di Olden-

barneveld School na Afrikaander Plein 40 na Rotterdam Zuid, banda di metro Station Reinhaven y Maashaven. E siguiente aña e concurso a sigui na "Het Klooster" un otro sala di Gemeente na Rotterdam Zuid. Publico a acudi masalmente haciendo e lugar chikito atrobe, sinembargo esaki no tabata motibo pa a stop di organiza e concurso di Dande te cu 1988 eynan.

Envista cu e Dande a bira asina grandi, e organizadornan a tene den un sala mas grandi y mas central pa tur hende por acudi. Nan a bay den e "Clubgebouw Odeon" cu ta brinda tur e facilidatnan necesario cu nan y tur e grupo- y cantantenan di Dande tabata desea durante tur e añanan.

Mirando atras e añanan cu nan a pasa den hopi situacionnan dificil, principalmente den e parti financiero pa mantene e tradicion na Hulanda, y mester a acudi na Banco pa a haci prestamo personal. Esaki tabata necesario debi cu nan a ricibi casi nada na subsidio compara cu e gastonan cu tabata haltisimo, te hasta a yega asina leu cu nan telefon tabata ser kita debi cu nan no por a paga.

Dicho di nos grandinan: "Con cu bay bin luchando Bo ta gana Gloria" y por bisa cu e "Gloria" cu nan a gana ta e "satisfaccion", ya cu e parti financiero te awe ta lucha cune, y subsidio te cu dia di awe ta nulo.

Pa motibo di e "Satisfaccion" ki mes, e organizadornan ta sigui organiza e Festival di Dande pa tur e Arubianonan na Hulanda. Nos folclor y cultura ta asina



gusta cu tur aña ta mira gruponan Surinameño, Indones, Turco, Marocano y otronan kendenan ta keda sorprendi con e Arubianonan ta uni y ta coopera cu otro.

Organizadornan di Festival di Dande na Hulanda kier a gradici tur e personanan cu a coopera cu nan durante e añanan pa cu e

Festival, e.o. gruponan di Dande, participantenan, juradonan, maestra- y maestronan di ceremonia, y voluntarionan.

Nan ta spera cu e logro aki ta ehemplo pa juventud, kendenan mester sigui cu nos cultura y tradicion Arubiano di Dande pasando esaki di generacion pa generacion.

COOPERACION SPECIAL PIDI DI ARUBIANONAN CU TA BAY HULANDA E WEEKEND AKI

ORANJESTAD (AAN): Pa celebracion di e Segundo Lustro di Dande na Hulanda, aki na Aruba nan tin e Layout traha pa e buki special di e Festival aki.

Nan ta pidi un cooperacion special na esnan cu ta bayendo Hulanda e week-end aki, pa hiba esaki pa e organizadornan na Hulanda. E envelop ta habri y ta encera documentonan pa imprimi e buki na Hulanda.

Debi cu tempo ta corto esaki no por ser manda pa Post, ya cu e lo no yega na tempo.

Si tin cualquier persona cu ta interesa pa yuda cu e favor aki, por yama 20684 pa yuda cu e bunita meta y trabao aki pa e Arubianonan na Hulanda.